

ERANSKIN BAKARRA

**BIZKAIKO GIZARTE URGAZPENERAKO FORU ERAKUNDEAREN EGITURA
ORGANIKOAREN ERREGELAMENDUA**

LEHENENGO TITULUA

GIZARTE URGAZPENERAKO FORU ERAKUNDEA

I. KAPITULUA

ESKUMEN-EREMUA

1. artikulua

Gizarte Urgazpenerako Foru Erakundeari dagokio, Gizarte Ekintza Saileko foru-diputatuaren zuzendaritzapean, berariazko programak gauzatzea eta zerbitzu publikoak sustatzeko, emateko edo kudeatzeko jarduerak egitea, Gizarte Zerbitzuei buruzko 2008ko abenduaren 5eko 12/2008 Euskal Lege berriak lurralde historikoetako organoentzat zehazten dituen eta Bizkaikoek agintzen dizkioten jarduera-arloetan eta eskumen-eremuetan.

Programa eta jarduera horiek Bizkaiko Foru Aldundiaren ebazpenen bidez zehaztu eta agintzen zaizkio GUFERI, Foru Aldundiak ezartzen baitu hari emaniko eginkizunaren eta eskumenaren araudi zehatza.

2. artikulua

Gizarte Urgazpenerako Foru Erakundea –GUFE, aurrerantzean– izaera administratiboa duen foru-erakunde autonomo bat da, Bizkaiko Lurralde Historikoaren Erregimen Ekonomikoari buruzko 1997ko urriaren 14ko 10/1997 Foru Araukaren 4.2.b) artikuluan ezarritakoaren arabera eratua eta Bizkaiko Foru Aldundiko Gizarte Ekintza Sailari atxikia, baina funtzioak deszentralizaturik dituena. Dena dela, Gizarte Ekintza Saileko foru-diputatuari dagokio GUFERen jardueraren zuzendaritza estrategikoa eta haren jardueraren emaitzak ebaluatu eta kontrolatzea.

GUFEk nortasun juridiko berezia du, bere ondarea eta altxortegiak ditu, eta badu gestiorako autonomia ere, denak bere estatutuetan ezarritako baldintzen arabera.

Honako hauek arautzen dute GUFE: bere estatutuek, Bizkaiko Lurralde Historikoaren Erregimen Ekonomikoari buruzko Foru Arauak eta Administrazio Zuzenbideko gainerako xedapenek; batez ere, toki-araubideari buruzkoek. Hala, bere eskumenen esparruan, GUFEk badu bere helburuak betetzeko beharrezko zaion administrazio-ahalmena, aplikatzekoak zaizkion arauetan aurreikusitako moduan.